

**ԿՈՍՏԱՆԳՆՈՒԴՈՒՄԻ ՀԱՅ ՊԱՏՐԻԱՐԲՈՒԹՅԱՆ ԿԱԶՄԱՎՈՐՄԱՆ
ՇՈՒՐՁ (XV – XVII դդ.)**

Ա.Ա.ԽԱՌԱՏՅԱՆ

Օսմանյան թուրքերի կողմից 1453թ. նվաճվելուց հետո Կոստանդնուպոլիսը (Ստամբուլ) իր երկրորդ կենսագրությունը սկսում էր իբրև կրոնական տարբեր հանրություններիով բնակեցվող մի այլ կայսրության մայրաքաղաք: Մահմեդ Ֆաթիհի ժամանակ արդեն մահմեդական տիրող ազգաբնակչության կողքին այստեղ ձևավորվեցին հույն, հայ և հրեա համայնքները: Սրանց պաշտոնական ճանաչումը պետության կողմից վկայում էր, որ օսմանյան տիրակալներն իրավական խմաստով սկսում էին նվաճված ազգաբնակչությանը միլեթների (համայնքների) համակարգի մեջ ընդգրկելու գործընթացը: Այս համակարգը, սակայն, ի սկզբանե պետք է ընդգրկվեր իր բաղկացուցիչ մասերի ներքին հակամարտություններով, որքանով տիրապետող ժողովուրդը հանդես էր գալիս նաև որպես տիրապետող կրոնը դավանող ժողովուրդ: Մեհմեդն իր նոր մայրաքաղաքը վերածեց օսմանյան ծավալված կայսրության միջուկին՝ մանրանկարի. այն վերաբնակեցվեց մահմեդական, հույն, հայ, հրեա, սլավոն տարրերով, որտեղ մի հայտնի չափով թվական գերակշռություն ունեին առաջինները: Կրոնական այս համայնքներն առանձնացվեցին դավանական, ավանդույթային և մշակութային կարգավիճակով՝ խմբվելով իրենց կրոնապետերի շուրջ: Հույն պատրիարքությունից հետո սկզբնավորվեց Կոստանդնուպոլսի հայ հոգևոր վարչությունը՝ առաջնորդ եպիսկոպոսի (հայրապետ) գլխավորությամբ:

Միլեթների համակարգ ստեղծելիս օսմանյան տիրակալները ելնում էին մահմեդական հանրային իրավունքի և իրենց նվաճողական քաղաքականությունից՝ բխող պայմաններից՝ մի որոշ չափով հենվելով նաև բյուզանդական ժամանակներից մնացած դավանական հանրությունների բաժանվածության սկզբունքի վրա:

Հայտնի է, որ ավանդական հայ պատմագրությունը 1461թ. ի վեր Կոստանդնուպոլսի հայ համայնքի կենսագրությունը սկսում է Մեհմեդի կողմից մայրաքաղաքում հայ պատրիարքության հաստատումով և Պրուսայի հայերի առաջնորդ Հովակիմի՝ պատրիարք նշանակվելով¹: Հովակիմի պարագան այժմ մի կողմ թողնելով՝ նկատենք, որ վաղուց ի վեր հայտնի է, որ դեռևս բյուզանդական ժամանակներում Կոստանդնուպոլսում կային հայ կաթողիկոսների կողմից հաստատված առաջնորդներ: Սա արդեն կարևոր հիմք և նախապայման է այն իրողության, որ այնտեղ գոյություն ունեւ հայ համայնք՝ իբրև կրոնական առանձին միավոր՝ երկաթնակ դավանանքի այդ մայրաքաղաքում: Կղեմես Գալանոսը նշում է, որ 1307թ. Սսի եկեղեցական ժողովին մասնակցել է

¹ Մ. Չամչեան, Պատմություն Հայոց, Հ.Գ, Վենետիկ, 1786, էջ 5:

² Ա. Պալճեան, Պատմություն կաթողիկէ վարդապետութեան ի Հայս, Վիեննա, 1878, էջ 281:

«Ստինպոլայ եպիսկոպոս» Հուսիկը²: Շուրջ մեկ հարյուրամյակ անց, 1401թ. Մոլդովայի իշխան Ալեքսանդրոս Բարին Սուչավայում հայոց առաջնորդություն հաստատելու մասին իր հրովարտական հայտնում է, որ «Յովհաննէս հայոց եպիսկոպոսը մեզ մոտ եկավ, առ մեր մոլդովական գահը և ներկայացավ մեզ Կոստանդնուպոլսոյ ուղղափառ Անթոնիէ պատրիարքի իրաւական թղթերով, որովհետև իրենց հայ պատրիարքը դեռ չեն ունեցած»³ (ընդգծումը մերն է – Ա.Խ.):

Ընդգծվածը պետք է հասկանալ միանշանակ, այսինքն, Կոստանդնուպոլսի Հայ պատրիարքը (առաջնորդը) դեռևս չի նշանակվել կամ չի բազմել աթոռին, ուստի և Հովհաննեսն իշխանին է ներկայացել Կոստանդնուպոլսի հույն պատրիարքի հավատարմագրերով: Այս Հովհաննեսի՝ Մոլդովա անցնելուց երկու տարի անց, Կոստանդնուպոլսի առաջնորդական աթոռն էր զբաղեցնում արքեպիսկոպոս Զաքարիան, ինչպես հավաստում է հիշատակագիրը «Ի թվ. ՊՕԲ (1403)... ի հայրապետութեան Կոստանդնուպոլսոյ արհիեպիսկոպոսի տէր Զաքարիայի»⁴:

Պահպանվել է Կոստանդնուպոլսի կողմերի Հովհաննես եպիսկոպոսի պատասխանը Բասիլիայի հայրերի՝ 1433թ. հղած «հրաւիրանաց թղթին» (քնադիր թարգմանություն է լատիներենից). «...զի մեք, Յովհաննէս եպիսկոպոս, կարգեալ ի կաթողիկոսէ մերմէ Ամենայն հայոց ի կողմանս Կոստանդնուպոլսի. եւ Նսայի եպիսկոպոս ի նմին քաղաքի եղեալ ի հոգաբարձութիւն եկեղեցւոյ հայոց»⁵:

Քրիստոնեական եկեղեցիների միավորումը գլուխ բերելու նպատակով Եվգենիոս Դ պապը հրավեր է ուղարկում նաև հայ եկեղեցուն՝ իր ներկայացուցիչներին առաքելու այդ առթիվ գումարվելիք տիեզերական ժողովին: Կոստանդին Վահկեցի կաթողիկոսը, որ միության կողմնակիցներից էր, գրություն է ուղարկում Կաֆա (Թեոդոսիա)՝ իր տեղապահ Սարգիս վարդապետին. «Ես իմով լի և կատարեալ ճոխութեամբ, – գրում է կաթողիկոսը, – ետու իշխանութիւն Սարգիս վարդապետի, որ է եւ եղիցի փոխանակ անձին իմոյ, ընդ նմին եւ Մարկոսի եւ Թումայի վարդապետաց եւ Յովակիմայ եպիսկոպոսի զի երթիցեն ի ժողովն...»⁶:

Իր այս մտադրության մասին կաթողիկոսը տեղեկություն է տալիս նաև Կաֆայի կայսերական հյուպատոսին. «...Լիով իշխանութեամբ մերով կարգեցաք փոխանակ անձին մերոյ գորդի իմ զՍարգիս վարդապետ, եւ զԹովմաս վարդապետ եւ զՅովակիմ եպիսկոպոս Բերիայ, զի երթիցեն ի Սիւնհոդոսն յայն օրհնեալ»⁷:

Երկու նամակներն էլ գրվել և հասցեատերերին են հասել 1438թ.: Երկու դեպքերում էլ հիշվում է «Յովակիմ եպիսկոպոս Բերիայ» բառակապակցությունը, որ վեճերի տեղիք է տվել ուսումնասիրողներին: «Բերիայ» ձևը վերագրվում է կամ Հալեպին (Բերիա) և կամ էլ Կոստանդնուպոլսի հանդիպակաց ճենովական բնակավայրին՝ Բերային (Փերա): Մ.Զամչյանը օգտագործում է «Յովակիմայ

³ Ս. Գ ո լ ա ն ճ ե ա ն , Ռուսմանահայություն Անին՝ Սուչավայի Հայ գաղութը, Ե., 2000, էջ 25:

⁴ Ժե գարի Հայերեն ձեռագրերի հիշատակարաններ (կաղմ. Լ. Ս. Խ ա չ ի կ յ ա ն), մասն Ա (1401 – 1450թթ.), Ե., 1955, էջ 41:

⁵ Ա. Պալմեան, նշվ. աշխ., էջ 81:

⁶ Նույն տեղում, էջ 88:

⁷ Նույն տեղում, էջ 89:

եպիսկոպոսին Բերիոյ» ձևը՝ փաստորեն լուեյայն ընդունելով, որ կաթողիկոսը նկատի է ունեցել Հալեպը: Ա.Պալճյանը չի շեղվում կաթողիկոսի գործածած ձևից՝ գրելով «եպիսկոպոս Բերիայ»: Ն.Ակինյանը՝ իր վերջնական տեսակետի մեջ և Բաբգեն եպիսկոպոսը կարծում են, որ «Բերիայը» պետք է հասկանալ «Հալեպ», իսկ Ա.Ալպոյաճյանը պնդում է, որ կաթողիկոսը նկատի է ունեցել Կոստանդնուպոլսի մերձակա Բերան⁸: Ընդամին, Ն.Ակինյանը կարծում է, որ Հովակիմին պետք է առնչել մի կողմից Հալեպի, մյուս կողմից՝ Կոստանդնուպոլսի հետ. «Յովակիմ» ձեռնադրուած Հալեպի թեմի վրայ, կը գործեր պաշտոնով Կ.Պոլիս»⁹, - դրում է նա:

Կարծում ենք՝ Ա.Ալպոյաճյանը հիմնավոր դիտողություն է անում՝ վերականգնելով «Բերա» ձևը և մերժելով «Բերիա-Հալեպ» ընթերցումը: Ծիշտ 1438-ին, երբ Կոստանդին Վազկեցին նամակով կայանալիք եկեղեցական ժողովում իրեն փոխանորդ էր ընտրում Հովակիմ եպիսկոպոսին, հիշատակարանը վկայում է, որ Կոստանդնուպոլսի արքեպիսկոպոսը Հովակիմն է. «Գրեցաւ գիրքս ձեռնադրութեան ՊԶԷ (1438) ի վայելումն արհիեպիսկոպոսին տէր Յովակիմին Կոստանդնուպոլսի, զոր տէր Աստուած վայել տացէ յամերամս ժամանակաց, ամէն»¹⁰:

Բաբգեն եպիսկոպոսը այս վերջին փաստը ծառայեցնում է Բերիա-Հալեպի Հովակիմի գոյություն իր տեսակետին. քանի որ 1438թ. Հովակիմ արքեպիսկոպոսը Կ.Պոլսի «առաջնորդական աթոռի վրա է, այս Յովակիմը ամենևին չի կրնար նույնանալ Հալեպի (Բերիոյ) Յովակիմ եպիսկոպոսին հետ, որը 1438 - 1440 Վազկացի Կոստանդին Զ-րդ կաթողիկոսի... կողմէն իբրև պատգամաւոր Փլորենտինա ղրկուեցաւ»¹¹, - գրում է նա: Բայց Բաբգեն եպիսկոպոսը որևէ փաստարկ չի բերում այն բանի օգտին, որ 1438-ին Հալեպում առաջնորդը Հովակիմն էր, բացի «Բերիայ-Հալեպ» ոչ հիմնավոր նույնականացումից: Վերը տեսանք, որ խոսքը վերաբերում էր միայն Կոստանդնուպոլսի (Բերայի) Հովակիմին, հետևաբար, այս նույնականացումը հիմնավոր չէ:

Այժմ կանդ առնենք Հովակիմ եպիսկոպոսի պաշտոնավարության ընթացքի վրա: Ըստ Մ.Չամչյանի, նախքան Կոստանդնուպոլսի պատրիարքի պաշտոն զբաղեցնելը, Հովակիմը Պրուսայի առաջնորդն էր և որ նա, իբրև պատրիարք, աթոռակալել է 1461 - 1478թթ.¹²: Մի հիշատակարանում դարձյալ հիշվում է Հովակիմ եպիսկոպոսը, որը նորոգել է Կուտինայի եկեղեցին՝ իբրև Պրուսայի հոգևոր պետ¹³: Իսկ Քյոթահիայի «քյուլթուկ»-ում գրված է. «Այլ և հաստատեցաւ յիշատակարանս այս ի թվին ՊՂԴ (1445) ամին ի հայրապետութեան տեսուն

⁸ Մ. Չամչյան, նշվ. աշխ., էջ 475, Ա. Պալճյան, նշվ. աշխ., էջ 87, Ն. Ակինյան, Կոստանդնուպոլսոյ Հայոց պատրիարքութեան սկզբնավորումը (Հանդէս ամսօրեայ, 1951, N 8 - 10, էջ 461), Բաբգեն եպ., Կ.Պոլսի Հայ պատրիարքութեան ծագումը եւ առաջին պատրիարք Յովակիմ եպիսկոպոս (Հանդէս ամսօրեայ, 1924, N 9- 10, էջ 440), Ա. Ալպոյաճյան, Իսթանպուլի Հայոց հոգևոր վարչութեան սկզբնավորութիւնը (Շողակաթ, բացառիկ, 1962, N 2, էջ 25): Տե՛ս նաև Հ.Զ. Սիրունի, Պոլիս և իր դերը (1453-1800), հ. 1, Բելրութ, 1965, էջ 107 - 111:

⁹ Ն. Ակինյան, նշվ. աշխ., էջ 461:

¹⁰ Ժե դարի Հայերեն ձեռագրերի հիշատակարաններ, մասն Ա, էջ 492:

¹¹ Բաբգեն եպ., նշվ. աշխ., էջ 440:

¹² Մ. Չամչյան, նշվ. աշխ., էջ 500, 113 («Ժամանակագրութիւն», հատվածը):

¹³ Տե՛ս Բաբգեն եպ., նշվ. աշխ., էջ 440:

Կարապետին եւ եպիսկոպոսութեան տեառն Ուվակիմայ»¹⁴: Ի լրումն Հովակիմների այս շարքի, Ամիրդովլաթի «Օգուտ բժշկութեան» երկի հիշատակարանում (1469) հիշվում է նաև Թիլիպեի (Պլովլիվ) առաջնորդ Հովակիմը. «Թարգմանեցաւ պատուական բժշկարանս... ի կաթողիկոսութեան տէր Ըսստակիսի եւ եպիսկոպոսութեան տէր Յովակիմին»¹⁵:

Արդյոք նույն անձինք են այս բոլոր Հովակիմները, որ կասկածի է ենթարկում Բաբգեն եպիսկոպոսը¹⁶, թե գործ ունենք նույնանուն տարբեր անձանց հետ: Վերջինս, սակայն, ընդունում է, որ Պրոսպյի առաջնորդ Հովակիմը կարող է լինել նույն ինքը՝ Կուտինայի եկեղեցին նորոգող Հովակիմը¹⁷: Այդպես էլ կա, որովհետև, հակառակ դեպքում Կուտինայի եկեղեցու նորոգման առթիվ Պրոսպյի առաջնորդի անունը չէր հիշվի: Այստեղ ավելացնենք 1447թ. մի ճաշոցի հիշատակարանը՝ գրված «ի ժամանակս քաջ Հովակիմին մերոյ տէր Յովակիմայ, որ է այսաւր վերատեսուչ նահանգիս Պու(ր)սայու և Կոստանդնուպոլսի և սահմանեալ վիճակիս իւրոյ»¹⁸: Ամրագրենք, ուրեմն, որ 1447թ. Պրոսպան և Կոստանդնուպոլսը մտել են մեկ առաջնորդության մեջ, որի մասն էր կազմում, ինչպես տեսանք, Կուտինան:

Իսկ այժմ փորձենք հանրագումարի բերել Հովակիմի (Հովակիմների) առաջնորդության վերաբերյալ բոլոր տեղեկությունները՝ իրենց աղբյուրներով (1438 - 1469):

1. 1438թ., «Յովակիմայ եպիսկոպոսի Բերիայ» (Կոստանդին Վահկեցի) :

2. 1438թ., «առհիեպիսկոպոսին տէր Յովակիմին Կոստանդնուպոլսի» (Գիրք ձեռնադրութեան):

3. 1445թ., Հովակիմ, եպիսկոպոս (առաջնորդ) Կուտինայի (Քյոթահիայի «քյութուկ»):

4. 1447թ., Հովակիմ, առաջնորդ Պրոսպյի և Կոստանդնուպոլսի (Ճաշոցի հիշատակարան):

5. 1461 - 1478թթ., Հովակիմ, Կոստանդնուպոլսի հայերի առաջին պատրիարք (Մ.Չամչյան)¹⁹:

¹⁴ Ա. Ալպոյաճեան, Յուշամատեան կուտինահայերու, Բեյրութ, 1961, էջ 186:

¹⁵ Ժե դարի հայերեն ձեռագրերի հիշատակարաններ, մասն Բ (1451 - 1480) (կազմ. Լ.Ս. Խաչիկյան), Ե., 1958, էջ 286:

¹⁶ Բաբգէն եպ., նշվ. աշխ., էջ 440:

¹⁷ Նույն տեղում:

¹⁸ Ժե դարի ձեռագրերի հիշատակարաններ, մասն Գ (1482 - 1500) (կազմ. Լ.Ս. Խաչիկյան), Ե., 1967, էջ 409 - 410: Հիշատակարանը գրել է Աբրահամ Անկյուրացու «Ողբում» հիշվող Աստվածատուր Սաթրյամիչի (որին ուրիշ երեք հայերի հետ միասին Մեհմեդ Անկյուրիայից գաղթեցրել էր Կ.Պոլիս) որդին: Վերջինս ձեռագիրը գնել էր Պրոսպյում և նվիրել Անկյուրիայի Ս. Քառասունք եկեղեցուն (նույն տեղում, էջ 409): Նա չի զլացել իր հիշատակարանում տալ Հովակիմի, իբրև «իմաստուն և հանճարեղ քննող և պատմող Հին և Նոր կտակարանացն ամենայն Աստուածաշունչ սուրբ գրոց» անձի բնութագրեր (նույն տեղում, էջ 410):

¹⁹ Մ.Չամչյանի աղբյուր կարող էր լինել Մ. դպիր Ճեփահիրճյանը, որը 1713թ. կազմել է Կոստանդնուպոլսի Հայոց պատրիարքների գալազանագիրքը [(Հ. Պէրպէրեան, Կ.Պոլսոյ Հայ պատրիարքներու գալազանագիրքը ըստ Մաղաքիա դպիր Ճեփահիրճեանի (Հանդէս ամսօրեայ, 1963, N 7 - 9, էջ 325 - 340)]: Գալազանագիրքը ունի մի քանի տարբերակներ. իր՝ Հ. Պերպէրյանի հրատարակած տարբերակում ևս Հովակիմի պաշտոնավարությունը, իբրև պատրիարք, սկսվում է 1461՝ Հայոց ԶԺ թվականից: Հավանաբար, Ճեփահիրճյանի մեկ այլ

6. 1469թ., Հովակիմ, եպիսկոպոս Ֆիլիպեի (Ամիրդովլաթ Ամասիացի, Օգոստ բժշկութեան):

Ընդունելի է, կարծում ենք, այն տեսակետը, որ միևնույն անձն են 1438թ. հիշատակված «Բերիայ» և Կոստանդնուպոլսի Հովակիմները: Նկատենք, որ Համոգիչ չի թվում Ն.Ակինյանի «Հաշտարարական» մոտեցումը, թե, իբր, Հովակիմի անվանը կցվել է իր ձեռնադրության վայրի անունը (Բերիայ-Հալեպ), իսկ ինքը առաջնորդի պաշտոն է վարել Կոստանդնուպոլսում, որին և իրավացիորեն առաքելում է Ա.Ալպոյաճյանը՝ նկատելով, որ «Բերիայ» անվան տակ պետք է հասկանալ Կոստանդնուպոլսին կից Բերան²⁰: Այս առթիվ մեկ անգամ ևս կրկենք, որ Կոստանդնուպոլսի Վահկեցի կաթողիկոսը իր նամակում նկատի է ունեցել Բերա-Կոստանդնուպոլսի առաջնորդ արքեպիսկոպոս Հովակիմին:

Միևնույն անձն են 1445թ. Կուտինայի առաջնորդը և 1447թ. Պրուսայի և Կոստանդնուպոլսի առաջնորդը. եթե 1445թ. Կուտինայի եկեղեցին նորոգողը Պրուսայի Հովակիմ առաջնորդն էր, ապա 1447թ. Պրուսայի և Կոստանդնուպոլսի Հովակիմ առաջնորդը ևս նույն անձն է՝ Հովակիմը: (Այստեղ արդեն չկա Բերիա-Հալեպ-Կոստանդնուպոլսի տարածական հեռավորության գայթակղությունը, որ մղում էր երևութական Հովակիմ ստեղծելու Հալեպում): Պրուսան այստեղ հանդես է գալիս որպես կապող օղակ, ճիշտ այնպես, ինչպես 1461-ից Հովակիմի՝ Կոստանդնուպոլսի հայերի հոգևոր գլուխ լինելու դեպքում. ըստ Մ.Ջամալյանի և Մ. Ճեփա-հիրճյանի, Հովակիմը Կոստանդնուպոլսի է եկել Պրուսայից, որտեղ վարում էր առաջնորդի պաշտոնը: Ասենք միայն, որ 1438 – 1447-ից սկսած Հովակիմն անխափան չի վարել Կոստանդնուպոլսի և Պրուսայի առաջնորդությունը: 1449թ. Պրուսայում հիշվում է մի այլ եպիսկոպոս, որի առաջնորդ լինելը չի բացառվում. «Գրեցաւ գիրք ձեռնադրութեան ի քաղաքին Պուրսա կոչեցեալ, ի թիւ Հայոց ՊՂ (1449) ի մարտի ԺԹ (19) ի խնդրոյ... առաքելաշնորհ եպիսկոպոսին տէր Մելքիսէթի»²¹:

1459թ. Կոստանդնուպոլսում ևս առաջնորդը Մարտիրոսն էր, ինչը պարզվում է Ամիրդովլաթի «Ուսումն բժշկութեան» գրքի հիշատակարանից՝ գրված «ի քաղաքն Կոստանդնուպոլսի եւ ի յառ ոտն վանիցն սուրբ Ստեփանոսու եւ ի հայրապետութեանն տէր Մարտիրոսին Կոստանդնուպոլսու վիճակին»²²: Հետևաբար, Հովակիմն անընդմեջ չի վարել իր պաշտոնները, այլ ընդհատումներով: 1438 – 1447թթ. ընթացքում՝ Կոստանդնուպոլսի, ապա 1445 – 1447թթ. առաջնորդ Պրուսայի և Կոստանդնուպոլսի (նաև Քյոթահիայի), այնուհետև, 1460-ին կամ առնվազն 1461-ին Պրուսայի, այնուհետև, նույն թվականից Կոստանդնուպոլսի առաջնորդ, այսպիսին է այս, իրոք նշանավոր հոգևորականի պաշտոնավարության ընթացքը առ այսօր հայտնի տվյալներով:

Վերադառնանք Ֆիլիպեի եպիսկոպոս (առաջնորդ) Հովակիմին: Սոսկ

տարբերակը նկատի ունի Կոստանդնուպոլսի հայ գաղթօջախի ականավոր պատմաբան Գ.Բամպուլեքճյանը, երբ գրում է, թե Հովակիմը, ըստ Մաղաքիա Ճեփահիրճյանի, պատրիարք է նշանակվել 1464 թվականին (K. Pamukciyan, Istanbul yazilari Cilt I, Istanbul, 2002, s. 4): Գ.Բամպուլեքճյանի այս արժեքավոր գիրքը մեզ է տրամադրել հարգարժան պրոֆ. Պ.Մուրադյանը, որին հայտնում ենք մեր շնորհակալությունը:

²⁰ Ա. Ալպոյաճեան, Իսթանպուլի հայոց հոգևոր վարչութեան սկզբնավորութիւնը (Շողակաթ, 1962, էջ 25):

²¹ Ժե դարի հայերեն ձեռագրերի գիշատակարաններ, մասն Գ, էջ 411 – 412:

²² Նույն տեղում, մասն Բ, էջ 115:

արտաքուստ է կնճռոտ Հարց ներկայացնում Ֆիլիպեի եպիսկոպոսի և Կոստանդնուպոլսի առաջնորդի նույնանունութեան հանգամանքը: Ավելի ընդարձակ մեջբերենք վերոհիշյալ հիշատակարանը. «Թարգմանեցաւ պատուական բժշկարանն ի մայրաքաղաքն ի Ըռտմիայ որ թարգմանի Ֆիլիպիայ ի թվականիս Հայոց ԶԺԸ (1469) ամին, ի դեկտեմբերի ԻԵ որ ծնունդ էր Փրկչին այլազգաց հաշուովն, ի կաթողիկոսութեան տէր Ըռստակիսի և եպիսկոպոսութեան տէր Յովակիմին»²³:

Ընդոտ այնպես, ինչպես Հովակիմը միավորում էր Կոստանդնուպոլսի և Պրուսայի թեմերը, այնպես էլ, 1469թ. նա կարող էր հանդես գալ իբրև Կոստանդնուպոլսի և Ֆիլիպեի առաջնորդ: Հիրավի, Ֆիլիպեի Հայերը գոնե 1460-ականի վերջին իրենց տեղական գործող առաջնորդը չեն ունեցել: Հ.Պերպերյանը նկատում է, որ Հովակիմից առաջ (այսինքն, մինչև 1461թ.) Ռոմեյիի Հայերը պետք է կախում ունենային Կոստանդնուպոլսի եպիսկոպոսից, որովհետև չունեին իրենց եպիսկոպոսը: Նա վկայակոչում է նաև 1307թ. Սսի եկեղեցական ժողովը, որին մասնակցել է միայն Ստինպոլի (այսինքն, Կոստանդնուպոլսի, Ստամբուլի) եպիսկոպոս Հուսիկը: Ընդամեն, Հ.Պերպերյանը հենվում է Մ.Զամչյանի աղբյուրի վրա, ըստ որի, Փաթիհը Հովակիմին էր տվել Հունաստանի և Անատոլիայի Հայերի վրա հոգևոր իշխանությունը՝ իրավամբ վերապահում անելով, որ «Անատոլիա» տեղանվան ներքո կարող էր ենթադրվել թուրքերի տիրապետության տակ գտնվող փոքրասիական մի սահմանափակ շրջանը²⁴: Խնդրին այս կերպ նայելիս հասկանալի է դառնում, որ Հովակիմը 1469թ., իրոք, կարող էր լինել Կոստանդնուպոլսի և Ֆիլիպեի հոգևոր գլուխը: Ա.Ալպոյաճյանը, իր հերթին, Ֆիլիպեի առաջնորդին նույնացնում է Կոստանդնուպոլսի առաջնորդ Հովակիմի հետ²⁵:

Բարգեն եպիսկոպոսը կարծում է, թե առհասարակ «այսպիսի իրարու շարայարեալ պաշտօնաւարութիւն մը չի կրնար բոլորովին հաւաստի ըլլայ»²⁶: Կարծում ենք, ընդհակառակն, ոչ հավաստին Հովակիմների թվացյալ առատութիւնն է, որ ընկալելի չափերի կարող է հասնել հանգամանքների այն հերթագայութեամբ, որ փորձեցինք վերարտադրել վերը:

Այժմ՝ Կոստանդնուպոլսի Հայ հոգևոր գլուխների պատրիարքական տիրտոսի վերաբերյալ, որ բավական չարչրկված հարց է դարձել գաղթօջախի պատմութեանը նվիրված ուսումնասիրութիւնների մեջ: Անտարակույս, Կոստանդնուպոլսում վերաբնակեցնելով հույների, ինչպես և այլ ուղղափառների (սերբեր, բուլղարացիներ), Հայերի և հրեաների, Մեհմեդը և նրա հաջորդները փաստորեն մայրաքաղաքը դարձնում էին տարադավան հանրութիւնների ընդհանուր բնակավայր, որից հետո անխուսափելիորեն առաջ էր գալու տարբեր կրոնների պատկանող համայնքների կարգավիճակի խնդիրը: Բայց այս խնդիրը սոսկ մայրաքաղաքին չէր վերաբերում, այլ կայսրութեան ամբողջ տարածքին: Այսպես էր նախապատրաստվելու Օսմանյան կայսրութեան մեջ միլեթների

²³ Նույն տեղում, մասն Ա, էջ 409 – 410:

²⁴ Հ. Պէրպէրյան, Կ.Պոլսոյ Հայ պատրիարքութեան հիմնարկութիւնը (Հանդէս ամսօրեայ, 1964, N 7 – 9, էջ 343):

²⁵ Ա. Ալպոյաճեան, Իսթանպուլի Հայոց հոգևոր վարչութեան սկզբնաւորութիւնը (Շողակաթ, 1962, էջ 29):

²⁶ Բաք. գ է ն եպ., նշվ. աշխ., էջ 440:

Համակարգի ձևավորումը XV – XVI դդ.: Կոստանդնուպոլսի Հայ գաղթօջախի պատմության համար այս իմաստով երկու հարց է ծառանում. արդյո՞ք Կոստանդնուպոլսի Հայ Հոգևոր պետի իշխանությունը տարածվում էր ամբողջ կայսրության տարածքում բնակվող Հայության վրա կամ արդյո՞ք նրա Հոգևոր իրավասության ներքո էին գտնվում կայսրության տարածքի մեջ մտնող Հայկական մյուս թեմերը: Սրան անմիջապես առնչվում է երկրորդ հարցը՝ Կոստանդնուպոլսի Հայ Համայնքի Հոգևոր գլխին XV դ. արդյո՞ք տրվել է «պատրիարք» տիտղոսը (որ անվերապահորեն Հայտնում է Մ.Չամչյանը), որ նրան ոչ միայն կառանձնացներ կայսրության մեջ մտնող մյուս փիճակների կամ թեմերի առաջնորդներից, այլև կնշանակեր, որ այս վերջինները կամ դրանց մի մասը ենթարկվել են նրա գերակայությանը:

Մ.Չամչյանի անվերապահ պնդումը, սակայն, քննադատության չի դիմանում և իրավացիորեն հերքվել է, մասնավորապես, պոլսահայ գաղթօջախի վաստակաշատ հետազոտող Հ.Պերպերյանի կողմից²⁷: Հիրավի, XV դ. ձեռագիր Հիշատակարաններում կամ այլ վավերագրերում Կոստանդնուպոլսի Հայերի Հոգևոր գլխին գրեթե առանց բացառության, պատրիարք տիտղոս չի վերապահվում: Այդ սկզբնաղբյուրներում նրա պաշտոնը հիշվում է «Հայրայպետ», «Հայրապետ», «Եպիսկոպոս», և «արհիեպիսկոպոս» հորջորջումներով²⁸: Բացառություն է կազմում 1480թ. դրված մի սաղմոսի հիշատակարանը: Գրիչ Մարտիրոսը այստեղ նշում է, որ վարդապետներ Մատթեոս Սեբաստացուն և Աբրահամ Տրապիզոնեցուն սուլթանը բերել էր «վասն պատրիարքոն քեան համար և սոքա ոչ առին յանձն լաւ համարելով զմիայնակեցութիւն, քան թէ փառք առնուլ մարդկանէ»²⁹:

Հ.Պերպերյանը, սակայն, հավաստի չի համարում գրիչ Մարտիրոսի տեղեկությունը՝ նկատելով, որ նա, լավատեղյակ չլինելով նույնիսկ Հայերենի ուղղագրությանը, կարող էր սխալվել՝ հույների նմանակությամբ Հայերին «պատրիարքություն» և նրանց Հոգևոր գլխին «պատրիարք» պատվանուն վերագրելով³⁰: Դիմենք հանրահայտ իրողությունների.

Հիրավի, «պատրիարք» պատվանունը XV դ., Կոստանդնուպոլսի գրավումից առաջ և հետո ազգային եկեղեցու նվիրապետության մեջ ամրագրվում էր ամենից առաջ կաթողիկոսներին: 1436թ. Համիթի եպիսկոպոս Մկրտիչ Նաղաշը Կոստանդին Վահկեցի կաթողիկոսին մեծարում էր այդ պատվանունով՝ «հրամանաւ տեառն իմոյ Կոստընդին պատրիարգի»³¹: Արձկեում 1460թ. գրված մի ձեռագրի հիշատակարանում հիշվում է Զաքարիայի՝ «ընդհանուր Հայոց կաթողիկոսի և պատրիարգ Վաղարշապատու էջմիածնի» անունը³²: Կիլիկիայի կաթողիկոսը մեծարվում է նույն տիտղոսով՝ 1469թ. մի ձեռագրում. «Զոր նախնեաց հետեւող գտեալ մեծ պատրիարք տէր Կարապետ» դարձվածում³³ և այլն:

²⁷ Հ. Պերպերյան, Կ. Պոլսի Հայ պատրիարքութեան հիմնարկությունը (Հանդես ամսօրեայ, 1964, N 7 – 9, էջ 337 – 350, N 10 – 12, էջ 497 – 510):

²⁸ Նույն տեղում, էջ 501, տե՛ս նաև Ժե դարի հիշատակարաններ, մասն Բ, էջ 115, 357, 286:

²⁹ Ժե դարի հիշատակարաններ, մասն Բ, էջ 441:

³⁰ Հ. Պերպերյան, նշվ. աշխ., էջ 501:

³¹ Ժե դարի հիշատակարաններ, մասն Ա, էջ 464:

³² Նույն տեղում, մասն Բ, էջ 135:

³³ Նույն տեղում, էջ 284:

Ուշագրավ է, որ Երուսաղեմի և Կոստանդնուպոլսի Հայ Հոգևոր պառիքների «պատրիարք» պատվանունն ղեմ կտրուկ առարկություններ անող Սիմեոն Երևանցին իր «Ջամբուլում» Հայ եկեղեցու նվիրապետության մեջ պատրիարքներ է ճանաչում չորս Համբավվոր վանքերի վանահայրերի, իբրև «նախապատիւ և գերհարգելի»՝ Էջմիածնի կաթողիկոսից Հետո. այդպիսիք են, ըստ նրա թվարկման, Թադեոս առաքյալի (Արտագ), Ստաթեի (Սյունիք), Ս. Աստվածածնի (Բջնի) և Ս. Նշան (Հաղպատ) վանքերի վանահայրերը, որոնք Էջմիածնի կաթողիկոսի տեղապահներն ու աթոռակալներն են և օծման ժամանակ ձեռքը դնում են կաթողիկոսի գլխին³⁴:

Այն, որ Հայերեն հայրապետ պատվանունը բառացիորեն պատճենված է Հունարեն պատրիարք բառից (պատրի-Հայր, արքիս-պետ) գայթակղիչ է՝ տեղիք տալով կարծելու, որ Հիշատակարանների Հեղինակները XV դ. հայրապետ ասելով նկատի են ունեցել Հենց պատրիարք տիտղոսը: Ն. Ակինյանը, թեև զգուշորեն, մի պահ տրվում է այդ գայթակղությանը. նկատի առնելով Ամիրդովլաթի «Օգուտ բժշկութեան» Հիշատակարանը (1459թ., «ի Հայրապետութեան տէր Մարտիրոսին Կոստանդինոպոլսիս վիճակին»)՝³⁵, նա գրում է. «Յիշատակարանին» ի Հայրապետութեան» ասութիւնը կը թուի ինձ, թէ իմանալու է Հայրապետ-պատրիարք-փաթրիկ»³⁶:

Այս կարծիքին չի կարելի Հանաձայնել՝ տերմինի գործածության իմաստով: Իր՝ Մ. Ջամջյանի տեղեկությունը Ֆաթիհի կողմից Հովակիմին պատրիարք տիտղոս շնորհելու մասին, որևէ փաստով չի ամրագրվում և Հիմնավորապես հերքվել է Հ. Պերպերյանի կողմից: Վերջինս ցույց է տալիս, որ ժամանակի ոչ հայկական, ոչ էլ որևէ օտար աղբյուր չի հիշում Հովակիմի՝ Պրուսայից փոխադրվելը կամ նրա պատրիարք տիտղոս ունենալը³⁷: Նա այդ տիտղոսի ամենավաղ գործածության ժամանակը ճշտում է հետևյալ կերպ. 1526թ. Սուլու մանաստրի եպիսկոպոս Գրիգորը (Մ. Ջամջյանի պատրիարքների ցանկում՝ 5-րդը. 1526 – 1537թթ.), սուլթանական Ֆերմանում հիշվում է ոչ թե պատրիարք, այլ մարիասա (կրոնական պետ) պատվանունով: Առաջինը իրեն պատրիարք է անվանել Աստվածատուր վարդապետը (1537– 1550)՝ 1543թ. մի ձեռագրում, որ վկայակոչում է Հ. Պերպերյանը. «Գրեցաւ սակաւ գիրս ձեռամբ Աստուածատուր պատրիարգին ի թվին ԶՂԲ (1543), ապրիլ ԻԱ (21)»: Հենվելով այս հիշատակարանի վրա, Հ. Պերպերյանը եզրակացնում է, որ պատրիարք պատվանունը սկսել է գործածվել Սուլեյման Կանունիի օրոք (1520 – 1566), 1526-ի և 1543-ի միջև³⁸:

Հ. Պերպերյանի նշած՝ 1543-ը պետք է 3 տարով ևս հետ տանել: Նույն Աստվածատուր պատրիարքի ժամանակ, 1540թ. մի Ավետարանի Հիշատակարանը

³⁴ Սիմեոն Երևանցի, Ջամբուլ, Վաղարշապատ, 1873, էջ 55:

³⁵ Ժե դարի Հայերեն ձեռագրերի Հիշատակարաններ, մասն Բ, էջ 115:

³⁶ Ն. Ա. Ակինյան, Կոստանդնուպոլսոյ Հայոց պատրիարքութեան սկզբնաւորումը (Հանդէս ամսօրեայ, 1951, N 8 – 10, էջ 462):

³⁷ Հ. Պէրպէրեան, Կ. Պոլսոյ Հայոց պատրիարքութեան Հիմնարկութիւնը (Հանդէս ամսօրեայ, 1964, N 7 – 9, էջ 341):

³⁸ Նույն տեղում, էջ 347 – 378: Աստվածատուրի այս տիտղոսը նույն 1543թ. մի վավերագրում նշվում է խոջա իտրրի կողմից. «Եւ գնեաց զգիրքս ի Ըստամբաւ քաղաքի, ի Աստուածատուր պատրիարգէն, ի Ժ Ֆլորի» [Մայր ցուցակ ձեռագրաց սրբոց Յակոբեանց (կազմ. Ն. Ե. պ. Պողոսեան), Երուսաղէմ, 1971, Հ. Ե, էջ 434]:

գրվել է «Ի ԹՎ ԶՂԹ (1540) ի Թագաւորութեան սուլտան Սուլայմանին և ի պատրիարքութեան տէր Աստուածատուր վարդապետին»³⁹: Հետեւեալը, պատրիարք տիտղոսի գործածութեան սկիզբը պետք է որոնել 1526-ի և 1540-ի միջև:

Կոստանդնուպոլսի Հայ առաջնորդների՝ պատրիարք պատվանվան ավելի ուշ շրջանում (Փաթիհից հետո) գործածվելու իրողութիւնն ամրապնդվում է Սիմեոն Երեւանցու դիտողութիւններով: «Ջամբու»-ում ակներև է Սիմեոնի դառնութիւնը էջմիածնի իրավունքները սահմանափակած կամ յուրացրած՝ Կոստանդնուպոլսի պատրիարքների նկատմամբ: Ասկայն, անկախ դրանից, նա բավական ճշմարտացի է նկարագրում պատրիարք տիտղոսի գործածութեան Հանդամանքները և դրա հետ կապված՝ պատրիարքարանի հետզհետե ծավալվող իրավասութիւնները Օսմանյան Թուրքիայի ողջ տարածքում: «Թէպէտ ի յետին ժամանակս, - գրում է նա, - ոմանք փառասէրք ախտամոլ սևագլուխք յանգլիսութենէ ազգիս՝ զժամ գառանելով՝ զինքեանս պատրիարքս անուանեցին և զհրաւիրակս իւրեանց նուիրակուեսս, զորս և գոհհիկ հասարակութիւնն ազգիս մերոյ անընտրողաբար սովորութիւն արարեալ կոչեցին և կոչէն: Այդպէս է և ի Կոստանդնուպոլսի, որ ոչ է երկիր և քաղաք Հայոց, այլ յունաց, յորում նստիւր յունաց պատրիարքն որպես և արդեն իսկ նստի»⁴⁰:

Քիչ անց Սիմեոնը գրում է, որ առաջնորդ նշանակվելով կաթողիկոսի հրամանով, այնուհետև Կոստանդնուպոլսի Հայ հոգևոր ղեկւնները հետզհետե անկախ դիրք են գրավել նրա նկատմամբ՝ օսմանյան կայսրութեան զորանալու, ասել կուզի՝ տարածական ծավալման համեմատ: «Յետ այնորիկ ի զօրանալ Թագաւորութեանն օսմանցւոց, և ի յաճախել իշխանացն և ժողովրդոց մերոց անդ, սկսան ընդվզել և ամբարտաւանիլ յանդր նստող առաջնորդքն և թողու զհոգևորն կանոն և առ յոտն արկանել զպատիւն Հայրապետին, հրամանագրով այլազգի Թագաւորին նստել ինքնազուլս՝ կանօնելով և զհարկս տալ յարքունիս յամէ յամ, յորոց և փաթրիկ անուանել: Ուստի և ի հասարակութենէ գոհկաց սովորութիւն եղեւ պատրիարք կոչիլ»⁴¹:

Վերոհիշյալ մտքերի մեջ արժեքավոր է այն, որ Կոստանդնուպոլսի Հայ առաջնորդները օսմանյան տիրապետութեան պայմաններում ոչ թե միանգամից, այլ ժամանակի ընթացքում են ձեռք բերել պատրիարքի տիտղոսը: Դրա հետ կապված, կոչվելով «պատրիարք», նրանք ամենամյա հարկ (պետական հարկը՝ միլի) են տվել արքունիքին և, փաստորեն, այս տիտղոսի վավերացումը սուլթանների կողմից, վավերացումն էր նաև պատրիարքի՝ կաթողիկոսից անկախանալուն: Այստեղ ուշադրով է նաև Կոստանդնուպոլսի առաջնորդների՝ օսմանյան հարկային համակարգի մեջ աստիճանաբար ձեռք բերած գործառութային գերի ընդգծումը, որ, ի վերջո, պետք է հասցներ նրանց իրավունքների և պարտականութիւնների աննախընթաց աճին՝ կայսրութեան մեջ

³⁹ Մայր ցուցակ ձեռագրաց սրբոց Թակոբեանց, Հ. Բ, Երուսաղէմ, 1967, էջ 22: Ուշագրավ է, որ Թուրքական որևէ ժամանակագիր, այդ թվում և Ալքսիս Բրաուդե B. *Foundation Myths of the Millet System*. In: *Christians and Jews in the Ottoman Empire* vol. 1, N.-Y.-London, 1982, p. 75).

⁴⁰ Սիմեոն Երեւանցի, նշվ. աշխ., էջ 56:

⁴¹ Նույն տեղում:

և Համապատասխանաբար, դրանց թուլացմանը էջմիածնի կաթողիկոսի Հետ ունեցած Հարաբերություններում: Այս գործընթացը ունեցել է շարունակական բնույթ, և չի կարելի այն սահմանափակել մի կարճ և որոշակի ժամանակահատվածով. բոլոր դեպքերում, այդպիսին սահմանելուց առաջ պետք է ասել, որ նշված էջմիածնի կաթողիկոսությունից անկախությունը առավել քան վերաբերում էր պատրիարքի կարգավիճակի անկախությունը (դարձյալ ոչ բացարձակ իմաստով) և նյութական անկախությունը (կաթողիկոսի առջև չյուլթապես պատասխանատու էին միայն Կոստանդնուպոլսից եկած նվիրակները և ոչ թե պատրիարքը): Մնում էր, սակայն, բարոյական, ավանդույթի ուժով պատրիարքի պատասխանատվությունը կաթողիկոսի առջև, որ, ի դեպ, արդեն XVII դ. բազմաթիվ ճեղքեր պետք է տար՝ օսմանյան մայրաքաղաքում կաթողիկոսի Հեղինակությունը վերածելով ընդամենը Հոգևոր-բարոյական Հասկացության: XVII դ. այսպես կոչված պատրիարքական կռիվների ամբողջ պատկերը, սկսած 1650-ական թթ., երբ պատրիարքի աթոռին Հայտնվում էին ամենևին էլ ոչ էջմիածնի Համակրանքը վայելող մարդիկ, իսկ դրանից մեկ տասնամյակ էլ առաջ՝ նաև աշխարհական աթոռակալներ, վկայում է, որ Կոստանդնուպոլսի պատրիարքությունը ընթանում էր սեփական, թող որ շեղումներով Հատկանշվող ճանապարհով: Եվ Հենց այդ ճանապարհին էլ պատրիարքությունը ոչ քիչ դեպքերում երկրորդական տեղ էր թողնում ազգային եկեղեցու մեջ Հոգևոր գերակայության վերաբերյալ ավանդական պատկերացումներին: Այս ամենի Համար դանդաղորեն, բայց և Հաստատուն, Կոստանդնուպոլսի պատրիարքները, փաստորեն այդ քաղաքի Հայերի առաջնորդները, Ֆաթիհի ժամանակ և դեռ դրանից երկար ժամանակ Հետո էլ, ձեռք էին բերում նաև իրական իշխանություն Օսմանյան Թուրքիայի մյուս տարածքներում գտնվող Հայկական թեմերի նկատմամբ: Այլ կերպ ասած, պատրիարք Հասկացության այն կողմը, որ վերաբերում էր ենթարկյալ վիճակներ կամ թեմեր ունենալուն, Կոստանդնուպոլսի պատրիարքության Համար տակավ առ տակավ լցվում էր իրական բովանդակությամբ: Այսինքն, այն, ինչին դեռ չէին Հասել կամ նվազագույն չափերով էին Հասել պատրիարքները՝ XV - XVII դարերում: Այս տեսակետից ոչ Համոզիչ են թվում Ա. Ալպոյաճյանի այն պնդումները, թե նախքան պատրիարքության Հաստատումը (նկատի ունի 1461 թվականը) արդեն կազմակերպված Համայնքներ լինելով, Մեհմեդի Փերմանով պատրիարքությանն են կցվել Հետևյալ թեմերը. Ա. Սվազ, Ս. Նշանի վանք կենտրոնով, Բ. Էնկյուրի, Ս. Աստվածածնի վանք, Գ. Պրուսա-Բյոթաճիա, Կարաման⁴²: Ա. Ալպոյաճյանը նաև

⁴² Թուրքիոյ Հայոց պատրիարքութիւն, Ընդարձակ օրացոյց ս. Փրկչեան Հիւանդանոցի Հայոց, Կ. Պոլիս, 1908, էջ 291: Հ. Պերպերյանը, առարկելով Ա. Ալպոյաճյանին, նկատում է, թե Հիշյալ թեմերը պատրիարքությանը կցվելու մասին որևէ Փերման գոյություն չունի, դրա վերաբերյալ չկան տվյալներ, ուստի Ա. Ալպոյաճյանի կարծիքը մնում է «երևակայական պատմագրության գեղեցիկ օրինակ» [Հ. Պերպերյան, նշվ. աշխ. (Հանգես ամսօրեայ, 1964, N 7-9, էջ 343-344)]: Ա. Ալպոյաճյանի տեսակետին Համոզիչ փաստարկներով Հակադրվում է նաև Գ. Բարդակչյանը, որը նույնպես որևէ փաստ չի գտնում, որ վկայեր նշված թեմերը պատրիարքության մեջ մտնելու մասին: Նա կարծում է, որ պատրիարքը զուտ Կոստանդնուպոլսի «ալթը ջեմաթի»՝ վեց թաղերի առաջնորդն էր մինչև 1612 թվականը, երբ նրա Հոգևոր իշխանությունը սկսեց տարածվել մայրաքաղաքի սահմաններից դուրս (տե՛ս K. B. Bardakjian, The Rise of the Armenian Patriarchate of Constantinople. In: Christians and Jews in the Ottoman Empire. vol. 1, N.Y. - London, 1982, p. 91-93).

կարծում է, թե Կոստանդնուպոլսի պատրիարքությունն են միացվել, նույն կերպ, Տրապիզոնի (1461) և Ղրիմի (1475) առաջնորդությունները⁴³, որ նույնպես չի ամրապնդվում փաստերով:

Սըվազը (Սեբաստիա) իր թեմերով առնվազն XVI դ. վերջերին և XVII դ. սկզբներին պետք է պատկանելիս լիներ Սսի կաթողիկոսությանը: Այսպես, 1589թ. վախճանված՝ Սեբաստիայի առաջնորդ Մինաս եպիսկոպոսի մասին ժամանակագիրը գրում է, թե «յառուրս սորայ Զուղայեցի Զաքարիայ կաթողիկոսն Սսոյ արար ժողով ի Բերիայ», որին մասնակցել է նաև Մինաս եպիսկոպոսը, ակներևաբար, իբրեւ. Ասին ենթարկյալ առաջնորդ⁴⁴:

Հիրավի, բացառվում է, որ էնկյուրին Սեզմեդի ժամանակ մտած լինի Կոստանդնուպոլսի պատրիարքության մեջ. 1464թ. մի ձեռագրում, որ վկայակոչում է Գ.Բարդակչյանը, ցույց է տրվում, որ էնկյուրիի հայերն ունեն իրենց հեղինակավոր եպիսկոպոսը՝ Ներսեսը, որը, մտահոգված Սեզմեդի իրականացրած մանկաժողովով, դիմում է ինքնուրույն գործողությունների և որտեղ Կոստանդնուպոլսի «հայրապետը» բնավ չի հիշվում⁴⁵:

Կարծում ենք, որ Պրոսան և Քյոթահիան Կոստանդնուպոլսի հետ կարող էին նշված ժամանակաշրջանում կազմել մեկ առաջնորդություն, ինչպես գրում է Ա.Ալպոյաճյանը: Վերոբերյալ՝ 1447թ. հիշատակարանում արդեն տեսանք, որ Հովակիմը հանդես է գալիս իբրև «վերատեսուչ նահանգիս Պու(ր)սայու և Կոստանդնուպոլսի և սահմանեալ վիճակիս իւրոյ»: Կնչանակի, գոնե 1447թ. Կոստանդնուպոլսի և Պրոսան կազմել են մեկ առաջնորդություն, ինչը, կարծում ենք, կարելի է տարածել նաև Քյոթահիայի վրա, դարձյալ Հովակիմի՝ Կուտինայի եկեղեցին նորոգելու առնչությամբ: Ինչ վերաբերում է Կարամանին, Տրապիզոնին և Ղրիմին, ապա այդ տարածքներից Սեզմեդի ժամանակ Կոստանդնուպոլսի քչված գաղթականության փաստը դեռևս որևէ հիմք չի տալիս կարծելու, որ այդ տարածքների հայերի վրա պետք է հաստատվեր Կոստանդնուպոլսի առաջնորդի հոգևոր իշխանությունը:

1469թ. Կոստանդնուպոլսի առաջնորդության մեջ կարող էր մտած լինել Ֆիրիպեն, որտեղ, ինչպես տեսանք, Հովակիմ անվամբ առաջնորդ կամ եպիսկոպոս փնտրելու հարկ չկա, որովհետև խոսքը վերաբերում է Կոստանդնուպոլսի և միանգամայն Ֆիրիպեի առաջնորդ Հովակիմին: Ամիրգովլաթի «Օգուտ բժշկութեանը» թարգմանվել է 1469թ.⁴⁶ Ֆիրիպեում, ուստի և հիշատակագիրը նկատի ունի Կոստանդնուպոլսի եպիսկոպոս Հովակիմին, իբրև Ֆիրիպեի հայերի առաջնորդի: Ինչ վերաբերում է XV դ. և հետագայում օսմանյան գրավված մյուս տարածքների հայության՝ Կոստանդնուպոլսի առաջնորդության հովվությանը պատկանելու տեսակետին, որ զարգացնում է Ա.Ալպոյաճյանը, այդ ևս չի

⁴³ Ընդարձակ օրացույց, էջ 291:

⁴⁴ Դիան հայոց պատմութեան, գիրք Ժ, Թիֆլիս, 1912, էջ 397:

⁴⁵ K.B.Bardakyan, նշվ. աշխ., էջ 91: Այս հեղինակը նկատում է նաև, որ 1441թ. էնկյուրիի հայերը ճանաչում էին Սսի կաթողիկոսության իշխանությունը (նույն տեղում): XVII դ. արդեն էնկյուրին պետք է որ մտած լինի Կոստանդնուպոլսին ենթակա վիճակների մեջ. 1642թ. մի ձեռագրում այն հիշվում է իբրև առաջնորդություն՝ Կոստանդնուպոլսի պատրիարքի նախադաս հիշատակումից հետո, «ի պատրիարքութեան Կոստանդնուպոլսոյ»՝ Կիրակոս վարդապետին և առաջնորդութեան յայսմ նահանգոյս Գաղատիոյ... Գաբրիէլ վարդապետին» [Հայերեն ձեռագրերի ԺԷ դարի հիշատակարաններ (1641 - 1660թթ.), հ. Գ (կազմ. Վ. Հակոբյան), Ե., 1984, էջ 51]:

Հաստատվում. որևէ վավերագրով⁴⁶: Կոստանդնուպոլսի առաջնորդությունը՝ նորանոր վիճակներ ձեռք բերելը օսմանյան նվաճումների ծավալման համեմատ, այսպիսի կարծիքը առաջինը հայտնել է Մ.Օրմանյանը, որին իրավացիորեն առարկում է Բաբգեն եպիսկոպոսը, այն համարելով «գեղեցիկ ենթադրություն»⁴⁷: Օսմանյան նվաճումների գործոնը շոշափելի դարձավ հետագայում՝ XVII դ. վերջերին և XVIII դ. ընթացքում, իսկ մինչ այդ, կարծում ենք, Հայ կրոնական կենտրոնների փոխհարաբերությունները ավելի շուտ կապված էին այլ գործոնների հետ, ինչպես Հայ եկեղեցու և նրա վիճակների ու թեմերի ավանդույթային կայունությունը կամ անկայունությունը, Թուրքիայի ու Պարսկաստանի ռազմաքաղաքական փոխհարաբերություններն ու կոնֆլիկտները: Չպետք է անտեսել նաև Հայ աշխարհիկ ու կղերական վերնախավի, առանձին անհատների կամ գործիչների կողմնորոշումները, կեցվածքն ու վերաբերմունքը կրոնական կենտրոնների նկատմամբ՝ վերոհիշյալ հարափոփոխ պայմաններում: Հետևաբար, Կոստանդնուպոլսի պատրիարքության ձևավորումը, նրա վիճակների ու թեմերի կայացումը ոչ միանշանակ ու բարդ գործընթաց էր, որ պետք է հաստատուն կերպարանք ստանար մի տեական ժամանակաշրջանի ընթացքում:

Կոստանդնուպոլսի պատրիարքությունը որակական փոփոխություններ պետք է ապրեր XVII դ. առաջին տասնամյակներին, երբ ջալալիների ապստամբություն, սովի և թուրք-պարսկական ռազմական բախումների հետևանքով օսմանյան կայսրությունում տեղի ունեցան ժողովրդագրական զգալի տեղաշարժեր: Առանձնապես լայն էր Հայ բնակչության գաղթի աշխարհագրությունը, որն ընդգրկում էր ոչ միայն Թուրքիայի խոշոր քաղաքները՝ Կոստանդնուպոլիս, Իզմիր, ծովափնյա այլ քաղաքներ ու շրջաններ, այլև Արևելյան Եվրոպա, Մերձավոր ու Միջին արևելքի տարածքներ և այլուր: «Եւ թէ Հաշուես ի Պուղտանայ մինչև Ստամպուլ, պուլթուն Ուսումելին մինչև մեծն Վանատիկ, նա՛ չկայ քաղաք, գեղ կամ չիֆուլիկ, որ Հայ չկենայ», - գրում է Սիմեոն Լեհացին⁴⁸: Նրա տվյալներով միայն Կոստանդնուպոլսում Հայ գաղթականների թիվը հասնում էր 40.000 մարդու⁴⁹: Հենց այս հոծ խմբերն էին, որ բարդացրեցին իրադրությունը «ալթը ջեմաթում»՝ պոլսահայ համայնքում: Եկվորները անխուսափելիորեն պետք է առնչվեին մայրաքաղաքի Հայ բնակիչների սոցիալական, կենցաղային, կրոնական և այլ հարաբերություններին՝ ծանրացնելով տեղացիների հոգսերը և հիմնականում ազատ մնալով նրանց հարկային բեռը այս կամ այն չափով

⁴⁶ Ընդարձակ օրացոյց, 1908, էջ 291 - 292:

⁴⁷ Բաբգէն եպ., նշվ. աշխ., էջ 440: Մ.Օրմանյանի և Ա.Ալպոյաճյանի այս երկետը անվերապահորեն ընդունում է Հ.Ժ. Սիրունին, ըստ որի, Տրապիզոնի և Ղրիմի գրավումից հետո (1461, 1475) այս շրջանները մտան պատրիարքության ենթակայության ներքո և որ պատրիարքության ենթակա թեմերը ավելացան Սելիմ 1-ի ժամանակ, երբ կայսրության կազմի մեջ մտան Կիլիկիան, Սիրիան, Միջագետքը, Մալաթիան, Պաղեստինը և Եգիպտոսը (Հ.Ժ. Սիրունի, նշվ. աշխ., էջ 298): Սակայն նշված հեղինակները որևէ փաստ չեն բերում այդպիսի ենթադրության օգտին: Մ.Օրմանյանը ինքն է նշում, որ Հայ եկեղեցու նվիրապետության պատկերը վերականգնելու համար չկան կանոնավոր ցուցակներ (Մ. Օրմանյան. Ազգապատում, Հ. Բ, էջ 2546), իսկ Հ.Ժ. Սիրունին գրում է, որ Հայտնի չեն նշված ժամանակաշրջանի (XV - XVI դդ.) ոչ Հայ եկեղեցու թեմերի ճիշտ քանակը, և ոչ էլ դրանց սահմանները (Հ. Սիրունի, նշվ. աշխ., էջ 300):

⁴⁸ Սիմեոն Դպրի Լեհացույ Ուղեգրություն, Վիեննա, 1936, էջ 8:

⁴⁹ Նուն տեղում:

բաժանելու պարտականությունից: Խուլ դժգոհությունը և հակասությունները խորանում էին երկուստեք՝ տեղաբնականների և գաղթականների միջև: Չվճարված կամ թերի և ուշացումներով վճարվող արքունական հարկը (միրի), հայ համայնքի խառնակ վիճակը, հակասությունները բարձրակարգ կղերի շրջանում այս ամենը խորացնում էին երկպառակությունները: 1612թ. այս լարվածությունը հասցրեց նրան, որ պատրիարք Գրիգոր Կեսարացին գահնկեց արվեց Զաքարիա Վանեցի և Հովհաննես Խուլ վարդապետների կողմից, որոնց հարել էր նաև Գրիգոր Դարանաղցին: Պատրիարքական իրավասությունները բաժանվեցին այս երեքի միջև, սուլթանական բերաթը ստանալով նրանցից մեկի՝ Զաքարիայի անունով: Այս առաջին բաժանումը որոշ տվյալներ է տալիս Կոստանդնուպոլսի պատրիարքի իրավասություն սահմանների վերաբերյալ: Նախ, Օսմանյան թուրքիայի հայաբնակ շրջանները բաժանվեցին երեք մասի. «Եւ զամենայն երկիրն երիս մասունս բաժանեցաք. յառաջին ամին Զաքարէն դրաք գլուխ. Ըստամբօլ նորա տուաք բնական պարաթին հին դապալայի երկրովքն եւ զԱնատոլի փարաքանդան (ցրված գաղթականները – Ա.Խ.) եւ զմեր քաղաքս ինձ ետուն եւ Յովհաննէսին՝ զամենայն Ուռումելն, բայց Ըռատօղուս», – գրում է Գրիգոր Դարանաղցին⁵⁰:

Մեկ տարի անց, 1613թ., կատարվում է պատրիարքական իրավասությունների երկրորդ բաժանումը: Դարանաղցուն բաժին է ընկնում Ռումելին (կայսրության եվրոպական մասը)՝ Ղալաթիայի հետ, Զաքարիային՝ Անատոլի փարաքանդան՝ Սկյուտարից այն կողմ, իսկ Խուլ Հովհաննեսին՝ Կոստանդնուպոլսիս ու Սեբաստիան՝ մինչև Կաֆա (Ղրիմ) և Քյոթիա (Քյոթահիա): Այս անգամ պատրիարքական բերաթը տրվել էր Խուլ Հովհաննեսին⁵¹:

1620թ. կատարվեց երրորդ բաժանումը, միայն Խուլ Հովհաննեսի և Զաքարիայի միջև (Դարանաղցին հեռացել էր եռապետությունից): «Եւ Խուլն Ըստամբօլ կու տիրէր եւ ամենայն Անատոլուն եւ Զաքարէն յՈսկողարն նատէր եւ ամենայն Ուռումէլ փարաքանդայիցն», – գրում է Դարանաղցին⁵²:

XVII դ. առաջին քառորդին պատրիարքական իշխանությունն այս բաժանումները ցույց են տալիս, որ օսմանյան իշխանությունները Կոստանդնուպոլսի հայոց պատրիարքարանը չեն դիտել որպես կայսրության մեջ բնակվող ամբողջ հայության հոգևոր կենտրոն, հակառակ դեպքում՝ մեկ պատրիարքի հոգևոր իշխանություն տակ կմնային նոր գոյացած կամ սակավամարդ դարձած հայաբնակ տարածքները: Մյուս կողմից, պատրիարքական իշխանությունը երեք անձի մեջ բաժանելը (անկախ այն բանից, որ նրանցից մեկը ստանում էր պատրիարքական բերաթը, իսկ մյուս երկուսը հաստատվում էին եմրով՝ հրամանով)⁵³, ցույց է տալիս, որ իշխանությունները հակամետ էին ընդլայնելու պատրիարքական իշխանության իրավունքներն ու սահմանները: Ամբողջ խնդիրն այն է, որ Կոստանդնուպոլսի պատրիարքությունը 1612

⁵⁰ Ժամանակագրություն Գրիգոր վարդապետի Կամախեցույ, Երուսաղէմ, 1915, էջ 180:

⁵¹ Նույն տեղում, էջ 181:

⁵² Նույն տեղում, էջ 192:

⁵³ Նախքան պատրիարքական իշխանության բաժանումը, Դարանաղցին «հրամանաւ թագաւորին» երկու տարի հովվում էր Կամախի և Էրզրումի փարաքանդան՝ գաղթական հայությունը, ընդ որում, հաստատվելով թուրքաբնակ պատրիարք Գրիգոր Կեսարացու

Թվականից հետո, կապված ժողովրդագրական նոր տեղաշարժերի հետ, սկսում էր նոր թեմերի վրա իր իրավասությունները տարածելու կամ նոր թեմեր ձեռք բերելու գործընթացը, որը տևելու էր մի երկարատև ժամանակաշրջան: Այս գործընթացը ավարտուն կերպարանք պետք է ստանար միայն XVIII դարում: XVII դ. երկրորդ կեսին ևս պատրիարքությունը դեռևս բավական հեռու էր օսմանյան տարածքների առաջնորդությունները տնօրինողի կարգավիճակից: Ավելին, պատրիարքարանը դեռևս պատահական և թույլ կապեր ուներ Արևմտահայաստանի և կայսրություն շատ հայաբնակ վայրերի վիճակների և թեմերի հետ: Դրա ակնառու վկայությունն են «Օսմանյան Թուրքիայի Հայոց կաթողիկոսության» հետ կապված երկու միջադեպերը 1631 և 1664 – 65 թվականներին: Երկու դեպքում էլ հետապնդվում էր էջմիածնից անկախ կաթողիկոսություն ստեղծելու գաղափարը, անտարակույս, էջմիածնին պատկանող վիճակներն ու թեմերը խլելով և դրանց միավորմամբ: Առաջինը այս մտահղացումը փորձեց իրականացնել Զաքարիա պատրիարքի և նրա համախոհների դրածոն՝ ժամանակին էջմիածնի կաթողիկոս Հռչակված Սահակը: Փորձը ձախողվեց մեծ վեգիրի հրամանով, իսկ ինքը՝ Սահակը, հատուկեց գանակոծվելու և մահմեդականացվելու գնով⁵⁴: Երկրորդ միջադեպը, որի գլխավոր դերակատարը Եղիազար Այնթապցին էր, համեմատաբար տպավորիչ եղավ. 1665թ. նա Հալեպում օծվեց կաթողիկոս⁵⁵, սակայն Սեհմեզ Դ-ն նույն թվականին վերահաստատեց Հակոբ Զուղայեցու կաթողիկոսական իրավասությունները՝ անվավեր համարելով Եղիազարին նախապես տրված կաթողիկոսական բերաթը⁵⁶: Նշված փաստերը վկայում են հետևյալը. եթե Կոստանդնուպոլսի պատրիարքության հոգևոր իշխանությունը տարածվեր Արևմտահայաստանում, ապա կբացառվեր այդ տարածքներում առանձին կաթողիկոսություն ստեղծելու գաղափարն իսկ: Նույն Եղիազար Այնթապցին կաթողիկոսական բերաթը ստանալուց հետո հասցրել էր ոչ միայն օրհնության կոնդակ ուղարկել երկրի բոլոր կողմերը, այլև ոմն Հովհաննես վարդապետի նշանակել Թոքատի առաջնորդ⁵⁷, որ չէր կարող անել, եթե Թոքատը ենթարկվեր Կոստանդնուպոլսի պատրիարքությանը:

XVII դ. երկրորդ կեսին ևս Կոստանդնուպոլսի պատրիարքությունը շարունակում էր մնալ իր նախկին իրավասությունների սահմաններում, և հենց այս իմաստով էլ պետք է հասկանալ Մարտիրոս Ղրիմեցու տեղեկությունը. «Ի թվականիս մերոյ ՌՃԸ (1659) յամսեանն... ի մայիսի ԻՆ (25) ... կամօքն Աստուծոյ և հրամանաւ Քէօփրուղու Մէհմէթ փաշա վէգիրին զգեցաք զխլաթն արքունարնձեռ պատրիարք անուամբ, որ և տեսուչ-գէտ և հովիւ կոչմամբ ի վերայ տեառնական հօտիս մեր, ի քաղաք Ըստամպօլ նուաստ վարդապետս Մարտիրոս Ղրիմեցի...»⁵⁸: Այսպիսի համեստ ձևակերպումներից էլ առաջ, սակայն, հայ կրոնական կենտրոնների միջև ծավալվել էր մրցակցություն՝

⁵⁴ Հայերեն ձեռագրերի ԺԷ դարի հիշատակարաններ (1621 – 1640), Հ. Բ (կազմ. Վ.Հակոբյան, Աշոտ Հովհաննիսյան), Ե., 1978, էջ 331:

⁵⁵ Ստորագրություն սրբոյ քաղաքին Երուսաղէմի քննութեամբ համառօտեալ ի Հաննա և ի Մարինոս պատմադրաց, Երուսաղէմ, 1859, էջ 192 – 193:

⁵⁶ Մատենադարան, Կաթողիկոսական դիվան, թղթ. 1, վավ. 64, թղթ. 1ա, վավ. 51:

⁵⁷ Սին, 1940, N 5-6, էջ 153, N 10 – 11, էջ 383:

⁵⁸ Հայերեն ձեռագրերի ԺԷ դարի հիշատակարաններ, մասն Գ, էջ 854 – 855:

Արևմտահայաստանի վիճակներին տիրանալու համար: Էջմիածնական վաղեմի վիճակների նկատմամբ իր հավակնություններն էր ցուցադրում Աղթամարի կաթողիկոսությունը: Հիջրայի Ռ-Ի-Գ (1650) թվականին, ըստ Սիմեոն Երևանցու, Աղթամարի Գրիգոր կաթողիկոսը, շրջանցելով Էջմիածնի իրավունքները, «Փարման բերէ ի յօսմանցուց թագաւորէն վասն Վանայ, Համթայ, Արճշու, Խլաթու, Մշու և Բաղէշու և այլոց մերձակայիցն, թէ՛ այսոքիկ ի բնէ մեր են վիճակք, այլք սևազուկք զաւթեալ են և ես մնամ ի ներքոյ միրիի»⁵⁹: Փիլիպոս կաթողիկոսը, սակայն, կարողանում է հետ բերել նշված վիճակները՝ անվավեր համարել տալով հօգուտ Աղթամարի տրված Փերմանը: Դավիթ Բաղիշեցին ևս (XVII դ.) ներկայացնում է Էջմիածնի և Աղթամարի հակասությունների մի դրվագ-1662թ. Աղթամարի կղերականներից ոմանք, գրում է նա «Հակառակ կացին Քրիստոսադիր սուրբ Աթոռոյն Էջմիածնի, կաշառս ետուն Վանայ փաշային ԸՃ (800) կարմիր ոսկի՝ ձեռամբ Աղթամարայ աղին, որ դու է (պետք է կարծել՝ ենիչեր աղասին – Ա.Խ.) և արդ առին ի փաշայէն, զնացին ամր (հրաման – Ա.Խ.) հանին ի Ստամբուլայ, թէ Վան քաղաք և Բաղէշ Աղթամարայ լինի»⁶⁰:

Այս վիճակները ձեռքից ձեռք էին անցնում ոչ միայն սուլթանների կամ մեծ վեզիրների ընչաքաղցովության կամ դյուրափոփոխ տրամադրությունների պատճառով: Այստեղ կարևոր է նաև այն, որ օսմանյան կայսրությունում գտնվող Էջմիածնական վիճակներն իրենց եկամտի մի նշանակալի մասը հատկացնում էին Էջմիածնին, որ դժվարացնում էր սլետական հարկի՝ միքիի գանձումը, որից էլ բողոքում կամ իր հիմնավորումներն էր բխեցնում, ինչպես տեսանք, Աղթամարի կաթողիկոսը⁶¹: Եվ վերջին հաշվով այս՝ նյութական շահագրգռվածությունն էր ընկած օսմանյան սլետական անձանց վերաբերմունքի հիմքում: Հակոբ Զուղայեցին Նղիազարի կաթողիկոսությունը կարողացավ անվավեր համարել տալ հատկապես օսմանյան կառավարողներին շահագրգռելու միջոցով և ոչ թե իր անձնական հմայքի շնորհիվ, ինչպես կարծում է Մ.Ջամչյանը⁶²: Զաքարիա սարկավազը իրավացի էր, երբ ցույց էր տալիս, որ Հակոբի իրավունքները սուլթանը վերահաստատել էր անցանկալի հետևանքներից խուսափելու համար: Կայսրությունում թեմերից զրկվելով՝ կաթողիկոսը, հենվելով պարսից օթանդակության վրա, կարող էր կասեցնել ուխտավորների հոսքը Երուսաղեմ, որի բերած շոշափելի օգուտներից կզրկվեր պետության գանձարանը⁶³: Օսմանյան սլետության համար, սակայն, իբրև ցանկալի հեռանկար էր մնում Կոստանդնուպոլսի սլատրիարքության միջոցով երկրի տարածքում գտնվող առաջնորդությունների ու թեմերի վերահսկողությունը: Դա էր, ի վերջո, պայմանավորելու սլատրիարքության կողմից Էջմիածնական վիճակների ու թեմերի հետզհետեյուրացման անկասելի ընթացքը: Էջմիածնի և Ասի, ինչպես և Էջմիածնի և Աղթամարի հակամարտությունները՝ վիճակները տնօրինելու հարցում,

⁵⁹ Սիմեոն Երևանցի, նշվ. աշխ., էջ 92-93:

⁶⁰ Մանր ժամանակագրություններ, XIII - XVIII դդ., հ. 2 (կաղմ. Վ. Ա. Հակոբյան), Ե., 1956, էջ 362 - 363:

⁶¹ Աղթամարի հետ Էջմիածնի վեճը շարունակվում էր նաև հետագայում, Ղազար Զահեցու ժամանակ, որին դարձյալ վիճակվեց նորոգել տալ Աղթամարի կողմից այս էլ որբորդ անգամ խլված վիճակների վերաբերյալ Փերմանը (Սիմեոն Երևանցի, նշվ. աշխ., էջ 95 - 97):

⁶² Մ. Ջամչյան, նշվ. աշխ., էջ 714:

⁶³ Զաքարիա սարկավազի Պատմագրություն, Վաղարշապատ, 1870, էջ 75 - 76:

Հարատևող գործընթացներ էին, որոնց, ի վերջո, միջամուխ էր լինելու պատրիարքությունը XVIIIդ. սկզբներից՝ ձգտելով իրեն ենթարկել նշված վիճակները: Սակայն XVIդ. 2-րդ կեսին Կոստանդնուպոլսի պատրիարքությունը Հագիվ թե որևէ նշանակալի Հաջողություն արձանագրեր նոր վիճակներ ձեռք բերելու տեսակետից: 1690-ական թթ. կեսին Կոստանդնուպոլսում ֆրանսիական դեսպանատան քարտուղար Պտի դը Լակրուայի Հավաստմամբ, Կոստանդնուպոլսի պատրիարքը վերահսկում էր միայն իր արքեպիսկոպոսական վիճակը, այսինքն՝ Արևմտյան Հայաստանում: մինչև Թոքատ և Ռումելիայում՝ մինչև Դանուբը⁶⁴:

Կարելի է կարծել, որ Կոստանդնուպոլսի պատրիարքությունը Օսմանյան Թուրքիայի տարածքներում գտնվող առաջնորդությունները իր ենթակայության տակ կառնե՛ր շատ ավելի վաղ, XVIIդ. երկրորդ կեսից, եթե դրան չխանգարեին տիրահոգակ պատրիարքական կոիվները (50 տարվա մեջ՝ 1650 - 1700թթ. պատրիարքական պաշտոնը ձեռքից ձեռք է անցել 27 անգամ, ընդամենը, մի քանի տարի պատրիարքական աթոռը թափուր է մնացել)⁶⁵: Պատրիարքների արագ փոփոխությունները, այդ պաշտոնի Համար Հայ կղերական ու աշխարհիկ վերնախավի լարած ինտրիգներն ու դավերը թուլացնում էին պատրիարքական իշխանությունը, խանգարում նրան հոսանքի կապեր Հաստատել առաջնորդությունների և թեմերի հետ: Հաջորդ՝ XVIII դարում, մասնավորապես Հովհաննես Կոլոտի և Հակոբ Նալյանի պատրիարքության ժամանակներից է, որ Կոստանդնուպոլսի պատրիարքությունը պետք է իր իշխանությունը տարածեր գավառական առաջնորդությունների մեծ մասի վրա:

К ВОПРОСУ О ФОРМИРОВАНИИ КОНСТАНТИНОПОЛЬСКОГО АРМЯНСКОГО ПАТРИАРШЕСТВА (XV - XVII ВВ.)

А.А.ХАРАТЯН

Резюме

В армянской историко-филологической литературе предметом длительных дискуссий являлась проблема личности и карьеры духовного предводителя константинопольских армян в 1461 – 1478гг. Овакима. Следует полагать, что упомянутый в 1438г. Оваким из поселения Бера близ Константинополя (а не Бериа-Алеппо) и упомянутый в 1438г. константинопольский архиепископ Оваким, а также упомянутые в 1445г. Кутинский, в 1447г. Бурсинский и Константинопольский архиепископы Овакимы, как и духовный предводитель армян Филипе (Пловдив) Оваким, упоминаемый в 1469г., суть одно и то же лицо. Далее до 1540г. в армянских документах титул “патриарха” не приписывался константинопольскому духовному предводителю армян. Его величали титулами «Հայրապետ», «արհիեպիսկոպոս», «եպիսկոպոս». Однако и после 1540г. длительное время власть константинопольского патриарха не распространялась

⁶⁴ Հ. Պէրպէրեան, նշվ. աշխ. (Հանդէս ամսօրեայ, 1964, N 7-9, էջ 344):

⁶⁵ Տվյալները՝ ըստ Ընդարձակ օրացոյց Ս. Փրկչեան Հիւանդանոցի Հայոց, էջ 184-186:

на епархии в Западной Армении и в других подвластных Османской Турции регионах, населенных армянами. Свидетельством этого являются не только факты распространения патриаршей власти в первой четверти XVII в., но и два эпизода, имевших место в 1631 и 1664 – 1665 гг., связанных с созданием армянского католикосата Османской Турции: они показывают, что этот новый католикосат должен был быть создан путем изъятия у Эчмиадзина епархий, находившихся в Западной Армении и других регионах империи.

Это означает, что в этот период власть константинопольского армянского патриаршества не распространялась на епархии в названных регионах.

Установление духовной власти константинопольского патриаршества в Османской Турции было сложным и длительным процессом, который должен был завершиться в будущем, в основном до конца XVIII в.